

# In provediment efficient cun forza electrica

## L'iniziativa dal pievel en discussiun

DA LUCAS DEPLAZES / ANR

■ **Il cussegl dals chantuns refusa l'iniziativa dal pievel che pretenda in provediment segirà ed economic cun forza electrica. Las finamiras èn già cuntegnidas en las strategias d'energia 2050.** L'onn 2013 ha ina grupp d'ecologs inoltrà ina iniziativa dal pievel cun 109 420 sottascripziuns. L'iniziativa vegn sustegnida d'in comité cun exponents da tuttas partidas politicas, plinavant da swisscleantech, Fundaziun per la protecziun dals consumers ed organizaziuns ecologicas. Concret pretenda l'iniziativa da la confederaziun e dals chantuns mesiras correspondentas per stabilisar il diever da forza electrica sin il nivel da l'onn 2011. Quella finamira duai vegnir realisada fin l'onn 2035.

### Las finamiras èn già sin buna via

Il cussegl federal propona al pievel da refusar l'iniziativa e fa attent che la finamira essenziala dals iniziants è già cuntegnida en las strategias d'energia 2050. Las finamiras dal cussegl federal per dapli efficienza d'energia sajan en l'emprima fasa schizunt pli rigurusas che las pretensiuns dals iniziants. Plinavant fa la regenza er allusiun a la Constituziun federala che pretenda in diever spargnus da l'energia. Finamiras concretas duain vegnir fixadas en la lescha u en ordinaziuns e betg en la constituziun. Il cussegl federal fa er attent che l'iniziativa focusseschia sin il diever da l'electricità, senza resguardar l'effizienz generala da l'energia. Il cussegl nazional ha refusà l'iniziativa cun 106 cunter 71 vuschs. Quella è vegnida sustegnida da la pss, dals verds, dals verd-liberals

e da la pbd. La maiortad è dal parairi che l'iniziativa na saja betg necessaria.

### L'iniziativa fa pressiuin

Cun set cunter tschintg vuschs recumonda la cumissiun dal cussegl dals chantuns da refusar l'iniziativa. Ina minoritad sustegna ils iniziants. En la debatta d'entrada ha accentuà *Ivo Bischofberger* (pcd/AI), il president da la cumissiun, l'actuala situaziun davart las strategias per il diever d'energia 2050. Las propostas delibe-

radas dal parlament duain passar la votaziun finala en questa sessiun. Cun quella strategias pon vegnir realisadas la pli gronda part da las pretensiuns dals iniziants. *Ruedi Noser* (pld/ZH), il president dal comité d'iniziativa, ha fatg attent che mintga ura d'energia betg duvrada saja la meglra mesira da spargn. Tenor Noser chatta l'iniziativa ina vasta acceptanza en tut las partidas. Quella iniziativa duai far pressiuin en cas ch'il parlament n'acceptass betg las strategias d'energia 2050 tar

la votaziun finala. En cas d'in resultat en favur da las numnadas strategias 2050 fiss il comité pront da retrair l'iniziativa e da desister d'ina votaziun dal pievel. Deplorabel saja dentant che las strategias 2050 na fixeschian naginas finamiras concretas. *Pascale Bruderer Wyss* (pss/AG) fa attent che la tecnica porschia novs potenzials d'economisar l'energia ch'ins duessia nizzegiar senza targlinar. Cun 24 cunter 16 vuschs ha er la chombra pitschna refusà l'iniziativa.



L'iniziativa dal pievel che pretenda in provediment segirà ed economic cun forza electrica è vegnida refusada dal cussegl dals chantuns.